

# De De Gulden Humor 1995 Gezèt



L.V.K.

't Limburgs Vastelaovesleedjes Konkoer

# Gruuts op Gulden Humor

TEGELN - Tijdens 'n feestelikke zitting höbbe de Samewirkende Limburgse Vastelaovesvereniging (SLV) de orde vaan de Gulden Humor 1995 oetgereik aon 't bestuur vaan de Stiechting 't Limburgs Vastelaovesleedjes Konkoer (LVK). Tot 't LVK dao biezunder gruuts op is woort al gezag in 't dankwoord. Meh 't zow mesjiens neet hielemaol dudelik euvergekonne zien....

DOOR CHRIT LEENDERS

## Gulden Humor

De Gulden Humor weurt oetgereik aon iemes dee de levesblijheid hoeg in 't vaandel heet stoon en dee ziech vreesloos en oetgeleentelikk heet gemaak aon 't Limburgse cultuur in 't algemeen en de vastelaovend in 't biezunder. Dat zegge de statuten. En es daan de beneumingskemissie nao riep beraod vint tot iemes aon dees kwalificaties voldeit kin dee iemes toch ellein mer gruuts zien.

## LVK

't Bestuur vaan de Stiechting LVK besteit oet 'n aontal luij die gere dat stök volkscultuur wat vastelaovend is ondersteune in de vorm vaan promotie veur 't vastelaovesleed. 't Besteit oet 'n aontal oprechte amatäörs aongevöld en ondersteund door professionele organisaties en medewerkers daorvaan. Dee mix heet 't meugelik gemaak om

tot 'n konkoer te kómme wat hiel vööl weerklaank vint.

## De echte winnaars

Netuurlik, 't bestuur vaan LVK stik vööl tied en energie in 't konkoer en alles wat d'r umheen zit. Meh boe 't in weze um geit is de vastelaovesmeziek. En dee weurt gemaak door al die doezende die eder jaor weer componere, tekste make, zinge, bloze, arrangere etc. en tot prachtige juweelkes kómme. Heijoet straolt die levesblijheid en blik dee Limburgse cultuur.

In de ier die 't LVK te beurt vèlt wèlle veer daan ouch gere al die luij betrekke. Veer doen dat ouch daadwerkelik mèt e deil vaan die luij op 1 december in Linne.

## Daank

SLV en alle aongeslote vereniging daank veur de waardering veur eus werk wat geer tot oetdrökking hób wèlle bringe door de Orde

van de Gulden Humor. Meh daank ouch veur al 't werk wat geer verrieck um in eur eige plaotse tot schlagers/leedjes/leedsjes te kómme. Want dee basis moot d'r zien aandere stèlt 'n euverkoepelend konkoer niks veur. Dat kin ellein veur weijer promotie, oetstraoling en stimulans zörge.

Daank ouch aon 't Gilde vaan Gulden Humor-dragers veur hun welwillendheid. Zie numme us op in hun midde. Welliech tot 't Gilde-effek nog get oetgewèrk kin goon weure in de riehting vaan gezamelikke acties in 't belang vaan euze Limburgse vastelaovend. Veer zalle heij gere initiatief tow numme. Daank aon ederein aandere dee us complimenteert en fêteert mèt 't verkriegte vaan de Gulden Humor. Veer weure d'r oongetwiefeld zoe noe en daan get besjeemp onder, meh 't huurt debeij en veer laote us daorum gewere....



Nie-je sjtart vur de S.L.V. - Blz. 2



L.V.K.

LVK 20 jaor "aon de geng" - Blz. 4



D'n Oeles

4 x 11 jaor - Blz. 6

colofon

De Gezèt

oetgebrach bij gelegenheid vaan de oetbreiking vaan de Gulden Humor door de SLV aon Stiechting 't Limburgs Vastelaovesleedjes Konkoer op 25 november 1995 in Tegelen en meugelik gemaak door de gezètte onder de LVK-sponsor.

oplage: 1500 stöks  
Oontwerp: Ted Reckman Design,  
Mestreech  
Drök: Corrijens, Mestreech

# Veurzitter Wim Leentjes wilt miër den allein maar Nie-je sjtart vur de

"Oet Limburg kump de meziek" zingk de kleine nachtegaal oët Mesjtreesch in eur hoëgste leed. Beej die wäörd sjluút Wim Leentjes zich gaer aan. Wat waas hae in de wolleke wie vur ein hallef jaor truúk bekend woort gemak, wae op 25 November de hoëgste ôngersjeiding van de SLV in ôntvangs meug nimme. Hertje zomer, diék dreej maond nao de presentasie van de winnaar vur de verzamelde pers in 't Gulpener Beerhoés, is de tevreejenheid nag van zien gezich aaf te laeze.

DOOR MARCEL VAN LIER

Ouch op deze zjwoele augustus-aovend in de Zitterdse wiek "De Kollenberg" (dankzij de femiliej Flodder baeter bekend as 'Zonnedael'), sjtik de veurzitter van Limburgs' aadste vastelaoves-bôngk ziën bewôngering vur de jonges en maedjes van de Sjtichting Limburgs Vastelaovesleedjes Konkoor (LVK) neet ônger tuinsjteul of ligbanke.

## Ôs eige songfestival

"Idder jaor zörg 't L.V.K. twie maond langk vur ein ôngekende luusterdichheid op de Limburgse zender. Op d'n aovend van de finale zitte dóezende minse met de oëre taenge de radio geplek um van de iërste wiés de letste minuut te geniete van ôs eige songfestival. Iddere sjtad, dôrp en buurtgemeinsjap laef intens mej met ziën favoriëte. Thoés in de hoëskamer is de sjpanning um te sjniëje, gans te zjwiëge van de sjtutting ônger de artiëste en eur supporters in de zaal. Maar det heuf ich ûch eigelik neet te vertelle.


Geej heb 't in Tegele vur ein paar jaor truúk zellef mej meuge make wie 't d'r in de

finale aan toe geit. En wie 't is um met 't winnende liedje te meuge prôngke!"

## D'r naeve

De letters S.L.V. sjtaon vur Samewirkende Limburgse Vastelaovesvereniging, vur wae det nag neet wis. Wat in Wim ziën auge euveriges besjlis gen 'sjang' is.

"Laote weej d'r gen dukskes um dreije, as vastelaoves-bôngk sjtelle weej neet vuël veur. De ierste en toet now toe einige kier det 't besjteur



ein belangriëke besjllissing woort gevraog, ging 't meten al d'r naeve. Dae Golfoorlog achtervolg ôs nag sjteeds. Det weej destiëds alle boëteaktiviteite hebbe aafgeblaoze, is ôs neet in dank aafgenaome. Maar, ja,

't is nôw einmaol gebeurd. Zo'n besjloët is neet miër truuk te dreije. Achteraaf is 't ein gôjje les gewaes. In iërste instansie woort de Zjwarte Piet nao 't besjteur gesjpeuld. Maar eigelik loog de sjöld beej de lidvereniging. Zeej ziën oëtelik de bôngk, neet 't besjteur".

Wäörd van geliëke sjtrekking kregde de leeje ouch te huëre wiëj zeej ein vur ein beej de niëje veurzitter woorde ontbaoje, met't verzeuk um zichzelf te presentere. Meneer Leentjes wôl waal ens weite wat vur vleis hae in de kûup had. Vanzellefsjpraekend waas 't SLV-opperhoof op ziën beurt ouch bereid te vertelle wat hae in de toekoms verwach van de samewerking tösse de inmiddels zestiën vereniging.

## "know-how"

Um te beginne miër inzet,

*De S.L.V., opgerich op 11 september 1962,  
is de euverkoepelende organisasie van de viëftiën  
sjtads-vastelaovesvereniging in Limburg.*

*De leeje ziën:*

* DE BAEKER POTTENTAOTE	(BAEK)
* BURGERLUST	(EYGELSHAOVE)
* 'T COMITE CARNAVALSVIERING	HOENSBROEK
* DE FLAARISSE	(GELAEN)
* DE KIRCHRÖATSJER VASTELAOVESVERAIN	(KERKRAOJ)
* DE MAROTTE	(ZITTERD)
* DE MIRLITOPHILE	(VALKENBURG)
* D'N OELES	(TEGELE)
* DE PIELHAAS	(VENRAOJ)
* DE ROGSITAEKERS	(WIËRT)
* DE STEINDER BÖK	(SJTIN)
* DE TEMPELEERS	(MESTREECH)
* D'N UUL	(REMUJND)
* DE WINGKBÛLLE	(HEERLE)
* DE AANHAWWERWSJ	(MEERSE)

en, sins dit jaor \* JOCUS (VENLO) as zestiende.

## médaliés oétdeile

# S.L.V.

miër betrokkenheid en bae-tere ôngerlinge kontakte.

"Al ôs leeje bezitte 'ne sjat aan kennis en ervaring as 't um vastelaovend viëre geit. Waorum zoele weej al dae "know-how" neet met elkaar deile? Zônger det d'n eine d'n angere geit nao-ape netuurlik. Behaad van de eige identiteit sjteit veurop. Zoë haet idderein beejveurbeeld ziën eige optoch-tradisieë.

Osjtreesch duit 't zus, Venraoy duit 't zoë. Maar 't gebrek des-ze euveral taenge kumps, is 't gebrek aan bouwplaatse. Zitterd haet dao-veur ein oplossing gevônge. Dao ziën de wagebouwers in ein groëte hal ôngergebracht. Vur de euverige leeje is 't missjiën bes interessant um ens te huëre wiej de Marotte det geflik hebbe en wat eur ervaringe zien, neet? Zoë kens-ze nag get van elkaar liëre!"

### De veurzitter

Wim Leentjes nimp zien taak as veurzitter hiel seriejeus. Osjtreesch haet absoluut genne zin um allein maar get door de provinsie te kraoze en links en rechts medaliés oët te deile. De Orde van d'n Gulden Humor oëtgezôngerd. Det is toch ein verhaol apart.

### Bedangk-briefke

"Die oëtreiking haet iets sjpésjaals en verdeent alle aandacht. Vruuger veel d'r op de candidate nag waal ens get aan te merke, veural as ze van baove de riviere kwame. En terech! De meiste hadde totaal genne bangk met de vastelaovend. D'n enige dae idder jaor braaf ein bedangk-briefke sjteurde, waas Luns".

Taegeswaordig geit de be-

neumingskemmissie 'n sjtök zorgvuldiger te werk. Vur de hoëgste ôngersjeiding van de S.L.V. kômme allein persoëne in aanmerking die zich verdeenstelik hebbe gemak vur de Limburgse kultuur in 't algemeen en de vastelaovend in 't biëzônger. Daonaeve deene zeej ein toënbeeld te ziën vur humor en laevesvreug.

Aan al die eise wuërt door 't L.V.K. ruúmsjoots voldaan, meint Leentjes oet de grôngk van zien hert.

### Erkenning

"Ich weit good det weej met dit sjtökske erkenning wet aan de late kangk ziën. De kontakte tösse de S.L.V. en 't Limburgse Vastelaovesleedjes Konkoer hebbe vuël te lang op ein waakvlempke gesjtaon. Det zal vanaaf nôw

besjlis gaon verangere. 't Fiës van de Gulden Humor in Tegele beteikent vur ôs 'ne niëje sjtart. As alle lidvereeniginge bereid ziën de sjouwers d'r ônger te zette, kump de samenwerking messjiën eindelijk 'ne kiër van de grôngk.

### Nie-je sjtart

Toët nôw toe besjting de S.L.V. feitelik allein op pepeër. Wat mich betref is daen tiéd vurbeej. Os taak as besjteur is ein gans niëje sjtruktuur op puët zette en relasiés aan te knuipe met angere organisatiés, zoë wie 't L.V.K., maar ouch de B.C.L. en de Limburgse artiëste. Want oeteindelik hebbe weej allemaol 't zellefde doel vur auge: 't in sjtand haa-je van ôzze Limburgse vastelaovend!"

## Winnaars Limburgs Vastelaovesleedjes Konkoer

1995 DE GANSE SANTEKRAOM	HORST
1994 HEEJ OF DAO	VENLO
1993 'NE LATE	TEGELÉN
1992 WAAT HEBBE WE 'T TOCH GOOD	VENLO
1991 DET IS EIN JOEKSKEPEL OP JOETS	VENLO
1990 ICH TIK NEET RICHTIG	GELEEN
1989 DE KNAPPERIKE	VENLO
1988 MINSE WIE WEEJ	VENLO
1987 WIEBÖLE	LINNE
1986 JAO, HEI IN LIMBURG	MAASTRICHT
1985 HAUT 'M VAS DE VASTELAOVEND	GELEEN
1984 DAO MOSTE MÈT LIERRE LEÈVE	MEERSSEN
1983 MIE LIMBURGS BLOOD	GELEEN
1982 ZOA MOOSJ 'T KËNNE BLIEVE	GREVENBICHT
1981 DE VASTELAOVEND HEURT BIE LIMBURG	ROERMOND
1980 DE BEERHERING	SITTARD
1979 DAN KAL ICH PLAT	GELEEN
1978 DE ZAAGTE GEEJ	REUVER
1977 VAAÑ EYSDE TOT DE MOOKERHEI	MAASTRICHT



## DE ORDE VAN DE GULDEN HUMOR

De orde van de Gulden Humor, de hoëgste ongersjeiding van de S.L.V., woort in 1962 vur de iërste kiër oëtgeriek aan CHARLES EYCK.

In de jaore daonao veel de "roëd-gael-greune" ier te beurt aan achtereinvolges TOËN HERMANS, GODFRIED BOMANS, GABRIËL BECKERS, JO HANSEN, JOHAN KAART, JOSEPH LUNS, BERTUS AAFJES, PIET MUYSELAAR, WILLY WALDEN (SNIP EN SNAP), PAUL VAN VLIET, HARRY LOONTJES, JAN KEUZEKAMP, MIEKE BOS-JANSSEN, WILLY CARON, GUUS BRAND, PATER SANGERS, MARJON LAMBRIS, NIC HOMMEL, ALFONS WINTERS, JAN LAUGS, TOON KORTOOMS, 'T LIMBURGS SYMFONIE ORKEST, ANDRÉ VAN D'N HEUVEL, PIERRE HUIJSKENS, THEI BOVENS, HAIS CHAMBILLE, 'T LIMBURGS SJÖTTERS-GILDE, DE LIMBURGSE MUZIEK-WAERELD, JAN HUIJSKENS, AD PFENNINGS, JEU SPRENGERS, HUUB MANS.

In 1988 woort de Orde neet oëtgeriek beej gebrek aan 'ne gesjikte kandidaat.

# Twintig jaor Limburgs Vastel

Al weer twintig jaor geleije is 't tot in Geleen de basis woort gelag veur 't LVK. De commercie dreigde ziech meester te make vaan de vastelaovesmeziek. Zwoer gepromote produksies en TV-presentaties vaan hollandse leedsjes ginge de eige leedsjes verdringe. En de tekste waore dèks zier dobbelzinnig en op 't rendsje. De openlikke strijd woort ingezet door Bertha Paulissen, indertied wèthawwer vaan Cultuur vaan Geleen meh veural 'nne iezervreter op 't gebied vaan (volks-)cultuur in allerlei vörrem.

## 't ierste

Mèt 7 leedsjes woort 't ierste konkoer gehawwe in 't Plenkhoes. En al direk kaom 'ne schlager nao vöore dee gans Limburg noe nog kin: Vaan Eysde tot de Mokerhei vaan Jean Innemee en Bert Salden. Dat woort netuurlik 'ne opsteker alhoewel critici toen stelde tot 't ouch 't einigste leedsje waor wat get te beteikene had. 't Twiede jaor waors 't niveau beter en waore miejer leedsjes de meujte weert. Meh toen kaom ouch al 't ierste sjendäölke. Vaan De zaagte G zien twee plaatopnames op de merret gekomme. Ouch zier tot ongenoege vaan de makers Arnold Wassen en Jan Theelen. Zoe ging 't konkoer 6 jaor door in Geleen.

## Limburgser

De Geleense stempel op 't konkoer woort neet good geach door de Geleense initiatiefnummers um te euverleve en voldoende oetstraaling te hawwe. (Euver zelfkennis en 'n kritische hajding gesproke..!) Daorum woorte gesprekke gehawwe mèt instanties wie 't LSO, de aofdeiling volkscultuur vaan de toenmaolige Culturele Raod Limburg, de vastelaovesbónde e.d. 'n Bestuursoetbreiding waor 't gevolg, boebij Bertha Paulissen es einige vaan de awwe groep euverbleef. 't LSO späölde de deilnummende nummers op 't zevende kon-

koer, ouch nog in Geleen. Daornao woort de res vaan de provincie opgezeuk. Iers in Remund in de Oranjerie en toen in Heerlerheij in 't Corneliushoes. En dat kosde bijnao de kop want zier slech weer zörgde tot mer e paar luij in de zaol waore. Dat waor e financiëel debacle. Noedgedwónge woort Geleen weer de standplaots umtot heij toch nog steeds voldoende respons kaom.

## de doelstelling

In die jaore waor de doelstelling um aonvöllend aon plaotselikke schlagers en leedsjes algemeiner Limburgse leedsjes tow te voge. Op die meneer móste de bove-moerdijkse invloede ingedamd weure en de plaotselikke makers gestimuleerd um kwaliteitsproducte te make door ziech (ouch) te laote in inspirere door de

leedsjes die aon 't LVK mètdege. Plaotselikke leedsjes kóste neet mètdoen aon 't LVK.

## Aanders

Nao 11 konkoerse boebij de financiële haolbaarheid steeds twiefelechter woort dach 't bestuur vaan 't LVK tot de doelstelling redelik bereik waor. De eige leedsjes leefde weer, euveral woorte plaotselikke konkoerse gehawwe en 't niveau waor in 't algemeen gestege. De doelstelling woort bijgestèl naor: archivering en toegankelijk make vaan de euveral versjeinende leedsjes en boe meugelik initiatieve numme um de plaotselikke leedsjes te ondersteune.

## protes en vervolg

Dit idee reep protes op vaan luij die 't stoppe vaan 't konkoer neet zaoge zitte. 'n Oetnudiging vaan Alf Poell veur veurzitter Chrit Leenders vaan 't LVK um in Speultere op de ROZ ein en aander te kómme towlichte leidde tot 'n oetgebreide gedachtewisseling en dat weer tot 'ne gemeinsjappelijke aonpak vaan 't konkoer in de vörrem wie 't noe bekind is. De veurgenome doelstellinge woorte gere bijgesteld en oetgebreid mèt extra promotie vaan de leedsjes die op plaotselik niveau gemaak weure en die door 't laote hure vaan de versjellende karakters vaan leedsjes inspirerend en motiverend wërke. En vööl vaan die leedsjes zien zier de meujte weert um e breijer publiek te bereike.

## wat steit us te wachte

Inmiddels steit 't negende konkoer in de nuije opzat al weer flink in de steigers. 't Is 'n fenomeen wat meujlik nog weg te dinke is in de



*Um alvas  
veuroet te kieke...!*

jaar	vastelaoveszondag	finale LVK
1996	18-2	2-2
1997	9-2	31-1
1998	22-2	6-2
1999	14-2	5-2
2000	5-3	18-2
2001	25-2	9-2
2002	10-2	1-2
2003	2-3	14-2
2004	21-2	5-2
2005	6-2	28-1

# Vastelaovesleedjes Konkoer



pripperasie naor de vaste-  
laovend vaan vööl Limburgers.  
Weer zoe'n 200 leedsjes zalle  
gezjureerd en tot 'n selectie  
vaan 30 tot 36 leijje. Oongeveer  
25 zjurielade oet de ganse  
provincie zien twie zaoterdage  
bezig um dee klus te klaore.  
Vaanaof 5 januari is gans  
Limburg op vriedagaovend  
vaanaof half zeve weer  
aofgestump op Umroop  
Limburg ...umtot 't daor te  
doen is. 2 Fibberwari is daan  
de finale vaanoet Horst en

vief café-lokaties in de  
provincie. In Horst zien alle  
finaliste beijein, in de café's  
de zjuries die 't eindoordeel  
oetspreke. Euver 't leedsje  
wat dit jaor tösse al die  
geweldige leedsjes es miest  
geslaagde naor vööre is  
gekómme...

Veer goon devaan oet tot  
radio nog 'n utermaote  
gesjik medium is veur 't  
konkoer meh de rizzjenale  
tèlvisie begint aon te  
kómme...

*Twee platenversies op de markt*

## Deining rond het Limburgs carnavalslied

*(Van onze verslaggever)*

**GELEEN** – Er is deining ontstaan rond „De Zaagte Geej”, de officiële Limburgse carnavalsschlager 1978, nu van dit lied 2 platenversies op de markt komen.

● Jan Theelen uit Munstergelen, de componist van dit lied, heeft bij de Buma een verzoek ingediend om te verhinderen dat de firma Telstar in Weert deze plaat op de markt brengt. Ondanks de pogingen van Jan Theelen zal Telstar vandaag een plaatje met daarop „De Zaagte Geej” in roulatie brengen.

Dit, terwijl zondag in de studio van Jan Theelen de opnamen werden gemaakt voor de „officiële” plaat, die begin december door Polydor op de markt wordt gebracht. De Buma heeft de plaat van Telstar niet tegen kunnen houden omdat directeur Johnny Hoes zich beroept op het z.g. Biemrecht, op grond waarvan hij alle muzieknummers op de plaat mag zetten zodra die

openbaar zijn.

### „Toegetakeld”

Jan Theelen ontkent dat recht niet, maar zegt: „Ik wil niet dat mijn liedje door Telstar wordt toegetakeld”. Op de „officiële” plaat komen niet de liedjes te staan die op het „Limburgs vastelaovesleedjeskonkoer” na „De Zaagte Geej” de hoogste ogen gooiden. Die nummers komen wel op de Telstar-schijf te staan.

**Zoals eerder gemeld zijn de componisten en tekstdichters van deze hooggeklasseerde inzendingen met de organisatie van het Limburgs vastelaovesleedjeskonkoer in conflict geraakt over het tekenen van een overeenkomst, waarin zij afstand van bepaalde rechten doen.**

## Limburgs Bèste

Selectie  
vaan 6 jaor  
Vastelaovesleedjes  
Konkoer



### *Eenkel activiteite van 't L.V.K.*

- \* in de ierste jaore is 't winnende leedsje op plaat oetgebrach
- \* nao 11 konkoerse is 'ne verzamel-lp oetgebrach
- \* vaanaof 't twelfde konkoer zien alle inzendinge gearchiveerd in 't Limburgs Volkskundig Centrum; dees' spulle zien veur ederein dee interesse heet besjikbaar
- \* ouch vaanaof 't twelfde konkoer is vaan 't winnende nummer 'n arangemint veur hermenie en fanfaar gemaak door Jo Keydeners in opdrach vaan 't L.V.K. Gratis distributie geit via de Boond vaan Muziekgezèlsjappe en Gulpener Beerbrowwerij (bij deze lèste eder jaor ouch aon te vraoge).
- \* twie cd's zien oetgebrach met winnende en aander deilnummende leedsjes
- \* 'n teks- en meziek-beukske is oetgebrach mèt steun vaan 't Anjerfoonds boein de nummers vaan de ierste verzamel-cd zien opgenome
- \* 'n aontal jaore is e good doel gekoppeld gewees aon de bonne in de gezette boemèt gestump kós weure. Diverse institute veur liechamelik en/of geistelik gehandicapte hóbbe middele of materiaal gekrege veur hun pupille, miestal op 't gebied vaan meziek.

Ouch al ieder woorte gooj doele bedach. Nao 't ierste konkoer (in 1977) woort 1111,11 gólde aon artieste royalties veur 't leedsje Vaan Eysde tot de Mokerhei

# D'n Oeles- 4x11

Oelesj  
Haufsjponsors



George Vossen  
MAKELAARS O.G.



ROOKWAREN ZOETWAREN KOFFIE THEE



Roltrans  
Group

Rabobank



BAVARIA BV

Gorrit B.V

Tegelen

Tegele- D'n Oeles besteit 4 x11 jaor. In 't kader vaan dit zjubileij organisere ze de oetreiking van de gulden Humor. De band tösse Tegele/Oeles en LVK is inkele jaore geleije extra stevig gewore toen veur de ierste kier in samewèrking mèt 'n plaatselikke organisatie de finale vaan 't LVK woort georganiseerd. Dee ierste kier waor e succes en dat laog veur e zier belagriek deil aon de Tegelse inbring. De jaorige Oeles aon 't woord bij monde vaan Toën Smeets, Oelesvorst.

DOOR TOËN SMEETS

"Na enige jaren van onderbreking schaaft Tegelen zich weer in de rij der carnavaliërende gemeenten".

Met dees wäörd begint burgemeister Pesch zien veurwäördje in 't offisijele programma van de Tegelse Carnavalsviering 1952.

Idder van ôs wet waal de reeje waarom det 't nao d'n oorlog ingkele jaore gedeurd haet, wiés det d'r wir vastelaovend gevierd kôs waere in ôs Oelesriék. Met alle resjpek vur diegene die destiëds de bekende belofte hadde aafgelag, achte me toch in 1951 d'n tiéd riép um de vastelaovend in Tegele in iëre te hersjtelle. Want weej kenne waal zegke, "D'n Oeles besjteit dit jaor 44 jaor", maar laot ôs neet vergaete det ouch wiéd vur d'n oorlog d'r duchtig gefiëts kôs waere in ôs Oelesriek. Zei 't, det toen 't vastelaovesgebeure geregeld woord door "Tegels Belang". Maar 't leedje wat nôw nag wuért gezonge as weej örges nao binne trekke: "De zorg aan kangk, d'n Oeles hoëg" was 't winnende liedje van 1937. Ich bedoel maar. Fiëste en vastelaovend viere is de geaerde Tegelenaer d'rin gebaore.



Zoe-as gezag, eind 1951 noome ein paar hiëre, o.a. Hein Cremers, Theij Rooskens, Jan Schouenberg, Rein Olders en Sjeng Denessen (ûzze iërste Oelesvors) 't inisjatief, naodet me 't ens waas det d'r get meus gebeure. D'r woord 'nen oproop in de Tegelse Courant gedaon en in september 1952 woord 't Oelescomité opgerich. En net as hae nôw nag gaer met

zien naas veuraan sjteit, waas ôzze Wiel as de kiëpe d'r beej um vanaaf 't iërste oor op de iërste riëj te zitte. Wiel Poeth, as d'r eine de naam "Mister Oeles" met ierste maag draage den is hae. 't waal. Vanaaf de opriching, toet op dit moment is hae nag aktief betrokke beej 't wel en wiëje van d'n Oeles.

Zoe ouch ôzze Piet Stoffels,

# =44 jaor!



dae ingkele maonde nao de opriching ziën deenste al besjikbaar sjtelde vur d'n Tegelse vastelaovend. Saame zulle zeej in 't zünke gezatte waere vur 't feit det zeej al 44 jaor vur de Tegelse vastelaovesgemeinsjap klaar hebbe gesjtaon.

Ein jubileejum, det ein unicum in minnige 'Vereinsgeschichte' is. 44 jaor - ein jubileejum wat geviërd geit waere. En terech, dit meug ouch geviërd waere. Want 't is eigelik gaar neet zoë vanzellefsjpraekend det ein vereniging as d'n Oeles 44 jaor besjteit. 't Feit, det d'n Oeles 44 jaor besjteit, hebbe weej te danke aan die vuële enthousijaste vreejwilligers die zich in de loup van dees 44 jaor hebbe ingezatte vur özzen Tegelse vastelaovend. Ich zegk bewus: vreejwilligers. Eemes dae lid wuërt, duit det -naeve det hae d'r zellef plezeer in zal hebbe ouch oët ein sjtök idéjalisme. Idéjalisme; um get te beteiken, iets te wille doen vur de tegelse gemeinsjap.

Want as-ze geis zinge, geis sjaake of visse, of wat vur ein vereniging den ouch, den dui-ze det op de ierste plaats um des-ze det zellef leuk vings.

Maar as-ze beej ein vastelaovesvereniging geis, den beteikent det op de iërste plaats, get te beteikene, get te organiseere vur ös Tegelse gemeinsjap, waobeej euverigens 't persuënlikke plezeer absoluut neet vergaete maag waere.

Daorum terech det d'r get geviërd geit waere.

En beej eine verjãordaag wuërt ouch altied 'ne wins

nao de toekoms oëtgesjpraoke. Ein toekoms die d'r ongetwiëfeld anders geit oëtzeen. Want de tieje zien aan 't verangere.

## Oetlaotklep

Waas in 't verleeje vastelaovend ein echte, maar ouch ein van de wiënige oëtlaotkleppe vur vuël minse; taegeswaardig is d'r elk weekend waal get te viere. Met 't geluif - de basis van de vastelaovend-haet 't - boëte d'n datum - vur vuël minse al hiëlemaol niks miër te doen. De jeug viert op ein angere meneer vastelaovend as vur 10, 20 of 30 jaor truuk.

Toch haet vastelaovend toekoms. Ein toekoms die weej deene in te vulle. In te vulle op ein menieër "D'n Oeles waardig". Burgemeister Rutten zaet beej gelaegeneheid van het 2x11 jãorig besjtaonsfies van "D'n Oeles", euver de kwaliteit van de leeje van d'n Oeles

## Inspireren

"Hier zijn geheel belangeloos mensen aan het werk, die niet alleen zelf levenskunstenaars zijn, maar ook anderen weten te inspireren tot eendrachtige samenwerking, zodat het Tegelse Carnaval elk jaar opnieuw weer een groot, hartverwarmend gemeenschapsfeest wordt."

Ich haop van herte det dit nag toët in lengte van jaore zoë zal zien.

## Oelesj Sjponsors



**Dings Kartonnages B.V.**



**OTTENHEYM**



**Jan Leenders bv**



**nic pas**  
installatietechniek bv

**ING BANK**

**interzuid**  
TRADEPORT-WEST VEHLD



**APOTHEEK**  
**GIJSEN B.V.**  
TEGELN



**TOM QUICKEN**

De Druk 1. 5431 BP Tegelen.  
tel. 077 3736328 - fax 077 3736329



*Veer zörge, eder op eus eige  
meneer, tot 't Limburgs Vastelaovesleedjes  
Konkoer kin wërke*



OMROEP  LIMBURG

***Dagblad***  ***Noord-Limburg***

**de krant die bij je past**

STICHTING  
KUNST & CULTUUR  
LIMBURG



L.V.K.